

# YUDEESA

## Yudeesafa ákara rúmaqoo úfafa.

<sup>1</sup>Qinée Yudeesa maa-pasána ákara rídaqa. Qinée Yísuna aináinira faiqi Yameesana ákaqa máridaqa. Qinée qeeqá qífasaanara Ánutuna ásauku mundírana Yísuna eedóo qímasee rumbára faiqara foora aináini marúnna faiqisa máridaqa ákara rídaqa.

<sup>2</sup>Ánutufa náaramásee qinée únannai ániaqee qufaqa eedóo qímariasa ínni ákara rúmannimaqaidaqa. Ínnee Yísuna ásauku mundírana mandaaqée maríasa maa-pasána ákara rúmannimaqaidaqa. Ínnee maasá qíkoona Ánutuna ámuqusiranaki máriasa ínni ákara rúmannimaqaidaqa. Ánutuna nífauarafa faqa aundurákinaa asooárana faqa firaqóo ínniara ámuqusirana faqa firaqóo ínni naunduráki máridanoo irairaafani.

### Únna ámaanufa qímannimimariasara qímaqoo úfafa.

<sup>3</sup>Óo qíní qifaaqasáa qíqoondiqa. Ánutufa maasá innaarúna ásumu márirana moodáa qimiqaifaqa minakí quqáqisáinara ákara rúani qímaseeqa minníseeqa moo úfa ákara ruanáura. Ánutufa moodáa kari nímu ufana maasá qímuna mi-ufána rákira ufara foora afeekaikámasee uqéera aindúsuaqa minára ínni afeekaikámandee ákara rúmannimaqaidaqa. <sup>4</sup>Faiqí akaqáusa Ánutunara sía fee qímariasa qumée ínniki kéeqafiqa dapikídaqa. Misá Ánutuna áfaariranara káqi nímiranara faqa iriséeqa quándakiqa mi-ufána eendaándi iséeqa minánnai faiqí ánaaseeki narí úmmuari narí úmmuari maríana faqa óosana óosana mandainaina faqa únna qímasee Yísunufa fee qímasaídaqa uqéeraseea. Misá maasá ásauku mundírana Yísunara maasá úriqararana maasá karaambáiqara qáoo qídaqa rukíaidaqa. Óoqai tamummáqara fasiqauqa ákarakinaa ufa misá firaa mandainaina ákiaqa árirana áqufuaqee qufaqa dóo maqee áqufidaqa.

<sup>5</sup>Ínni moo áinainara náaqoo áuqaidaqa. Óoqai Ánutufa Isaraee máqanna Isipa máqusaindaraana rafíamareenoo aadána maqa maaqaki quqánau. Quqásoofaqa akaqáusa quándaki Ánutuna ufa rukíasee

káqirúnna ubeekaqáú. Miqífufanoo Ánutufa sía nífaunanau káqi nárináu. <sup>6</sup>Ínnee Ánutuna qangiroouqára faqa sía fee írīdee. Óoqai misá firaa uriqaranaki márufafa miná minnísee nári qímaqoomau akaqáusa fufanóo Ánutufa sía nífaunanau káqi qumáraseenoo sáinandannai ruúmbeeqeenoo náaru rumbáranaki maqá ámeemaanai asukunaki quqáqai faqa márīdaqa muánni Ánutuna ufa írira faasaanara áfeesida márīdaqa. Mi-faasaanásaa nárīra ufa qímannimiannoo minára áfeesidaqa. <sup>7</sup>Ínnee Soodooma máqusa faqa Koomoora máqusa faqa misaqá máru maqusanaasa faqa ínnee írīdee. Misá mandá qángiroo naanna réeqa nári qímaqoomau fíqa faiqí ánaasee narí úmmuari narí úmmuari íqa faiqí narí aqoónna fasiqa úmmuariqa óosana óosana mandainaina faqa mároofanoo Ánutufa aiqámausa mi-oosanná qáfeeqa rufīaaqee qímasee náaru márīra idáki misá quqánau.

<sup>8</sup>Miqíkai másee máq maqee ínniki mandóosana uqéeree mariasa óoqeenáasa naanna ráīdaqa. Maqee ínniki marīasa qainámaseeqa Ánutuna ufámmifoo qímasee mi-maú fíqa áaqamaki náriqa nárīdaqa. Misá Ánutuna áanoora sía rufīaīdaqa miná ufa rukíaseeqa nári qímaqaa áatata fīdaqa. Mi-mandoosanná máree marīasa innaarúnai ámiqiraua márīanara mandúfa qímannimaqāīdaqa. <sup>9</sup>Ánutuna ámiqira qangiroouqa rirímma óoqai Mooseefa kuqufufanoo Sadannafa miná írī qumaráanee qufanoo ámiqira qangiroouqakīqari úriqararafa moó fannoo miná áuqu Mikaraafa mifá Sadanna faqa ufa rainánau. Ufa raináīdanoo sía ínniki ani márīasa naanna ranau. Sía áqira ufa mandúfa Sadannara qīnau. Ánutuna ufara iriséenoo káqi maaqí qímasee reendeenámasee qímaminau. Óo Sadanna Ánutufa aníara qáoo qīdanoo. <sup>10</sup>Máq ínniki mandóosana uqéeree marīasa sía ámiqira qángiroo aanna ráīdaqa níranaqarufa óonumafi irisée káqi qīdaqa. Nári sía qáfee maría ainainnara qímasaīdaqa níqīdaqa. Misá káasau aandau aanna ráīdaqa. Misá nári írīrana irisée aandáq oosanamau fīdaqa. Mi-maú fīmarīafanoo nári mandóosana fannoo nári nárīdanoo. <sup>11</sup>Misá nárīrafa firaaqóo márīannoo. Minára írīfanoo náaquqaani. Misá Kaina aatáta fīdaqa. Kainafa Ánutuna ufa rukíee marúfa márīdanoo narí ákaqa árinau. Misá kafáa Baraamana mandá aatata fīdaqa minakí kéeqararee qímaseeqa narí rarisée narí rarisée mámaree fīdaqa. Baraamafa munnimmará rúmammareenoo únna qímasee Isaraee máqannaasa rarisámeeqee mandáīnainaki quqée marínau. Misá moo fásīqa óoqeenáa fasiqa Kooraana aanna ráīdee qímasee Mooseenasáaqari rakéemaku áadumarunna nárīara moo káraambaiqee qímasee fufanóo Ánutufa miná faqa miná áiku ásauku miná faqa fusá faqa nárīnau. Máq ínniki mandóosana uqéeree marīasa náriqa kai nári nárīrana maréeqee Ánutuna nárīranaki quqáseeqa minakí márīdaqa. <sup>12</sup>Ínnee Ánutunara qoomáqa sakasée náīdaqa néemarīfaqa mée ínniki mandóosana uqéeree

maríasa nári mandáinaina námufaqa aniréeqa sía moosára óonumafi írídaqa nifaaqa quqáseeqa káqi náriaraa kai firaqóo nárana náidaqa.

Misá ufidaina áukuana aandaróo áukuana oonámuara foora aniraifaqa óo aaku asoóra ainaina ániannoommifoo qímariafanoo káqi áiqareenoo fifanoo úfai fannoo misá maréeqeenoo áqidanoo aaku sía márísa márídaqa, sía andeeqára óosana uqaqífíqeenoo aupúrarana kai uqaqífíqeenoo. Mi-fasiqáusa sía qaqamma írai sáqari fára foora márídaqa, írai aukuanna óosana rarákusee qáfaafanoo aadána kai márídanoo sía nammári nammáridanoo. <sup>13</sup>Mi-fasiqáusa mandáinaina fannoo nammári qáqaarara foora nári mandáinaina akooqóo mándinoo márifaqa sía nisaurídaqa éekara árinoo akooqóo márídanoo. Misá mée sandée mari fasauna aanná raidaqa, sandámammaree asukunakí múnu qimbáidaqa. Ánutufa mi-fasiqáusa maqa máaqa miqí kai másee firaa asukunakí meemái afeedamá nímaqaifanoo márídanoo.

<sup>14-15</sup>Óoqai Eeookafa mi-manda fasiqásusa tamummaqaséenoo ákara rúmaqoofa márídaqa. Ádanasáaqari moodáannai qísauku óosana taikáfufanoo dínni ani moodáa máreenoo qaraikínoo Eeookafa kambíqanau. Mi-Eeookáfa maaqí qímasee tamummaqaséenoo ákara rínau. Ínnee íriaqa Ánutufa narí náaquqara andeeqara qangiroouqa moómoosa faqa qumuréenoo aiqáma maqásaa qaraasa suqúsee ufa nímiannoo, mandóosana máree maríasa Ánutunara sía írimaríasa misá Ánutuna ufa rukíasee mandáinaina óosana óosana máree maríanara Ánutufa faqa narí qangiroouqá faqa náríra qúmuannoo. Mi-manda fasiqáusa Ánutunara mandúfa óosana óosana qíranara Ánutufa náríra qúmuannoo. Dóo Eeookana tamummáqara ufa miqímínoo márídanoo. Eeookafa misára miqí qímasoofaqa qinée máá ínniki mandóosana uqéeree maríasara mi-maú fímariafaqa maaqí qídaqa. <sup>16</sup>Mi-fasiqáusa maqee maqee aiqáma ainainara náundaufa náundaufa qída márídaqa. Misá aiqáma ainainara ámiqira ainainara faqa sía maasá dídifafa mandáinaina fee kai qídaqa. Misá nári mandóosanara nídirana áandí áususeeqa náriqa mi-maú fídaqa. Misá firaqóo naríara naríara nimooqímaríasa márídaqa. Misá nári mandóosanara nídirannai ubeekárara faiqí akaqáusa marasée nímooqaidaqa ámiqi ámiqidaqa misá maasá mandóosanamau fídaqa maasá dúqu uqéereefaree qídaqa miqídaqa.

#### **Aaquqímannimaqarufa faqa naakáparufa faqa qímaqoo úfafa.**

<sup>17</sup>Óo qiní qíqoondiuqa karaambáiqqa Yísufa ásauku mundírana miná faiqi námu ufa qímannimiqoona sía aunúqa. <sup>18</sup>Misá maaqí qímasee ínni qímannimiqau. Taikára áukuana aniráinaqa faiqí moómoo kooroomáfiqa nári mandóosanara nídiramau fídaqa ínniara naanaidara qifáranoo.

<sup>19</sup>Mi-fasiqáusa faiqí qámbaana aniréeqa rainée maríasa. Miqí maríasa

sía Ánutuna maraḡuna náakirausa máridaḡa náriḡa faiḡí faiḡi nídiramau kai fímariasa máridaḡa. <sup>20</sup>Ínnee qiní qíḡoondiuḡa sía miḡímariasas máriafanoo. Ínnee Yísuna náaquḡara ufakí máriasa máriafanoo máaḡara foora áuḡiḡa fífi inaḡa minakí afeekaíḡiaḡa. Ínnee Ánutuna náaquḡara maraḡunannái maḡee maḡee innaaru qiaḡa. <sup>21</sup>Maasá karaambáiḡa Yísufa ásauku mundírafa narí nífauarana firaanáḡiqari maasá sía dáruanoo náaru náaru márirana maasá qímiannoo. Ínnee Yísuna qúmíranara áfeesidaḡa Ánutufa ínniara nídimarinaki minakí kai máriaḡa sía moósaa fínana kurídia.

<sup>22-23</sup>Ínniki faiḡí akaḡáusa Yísuna mandaaḡáranara marammara rídaḡa qaara irirana máree maríasa, sía ínnee miḡímariasas ánoománnimaḡaaḡa nífaumasaiḡa máriaḡa. Náaru máriara idákinaana Yísuna ufannai kárrí qínaḡa qumáreeḡee Ánutuna afeeka quḡusaki quḡáaḡa. Akaḡáusa mandóosana máree maríasa faḡa nífauarana faḡa rufíara ufa faḡa qímannimisee qumáreeḡee Ánutuna quḡúsaki quḡáaḡa. Ínnee miḡí máriḡaḡa misá mandóosana qáfamasee sía minára ruaḡa ínnee faḡa minakí fifáara. Misá mandóosana ikairíara ruffasee fídiaḡa iaḡa.

#### **Ánutunará kai asiasiaḡee ufa qímaḡoofa.**

<sup>24</sup>Ánutufa ínnee mandáinainaki áḡufirarifanoo mifá amaná ínni ititánnisainaḡa sía áḡufifaranoo. Mifá amaná ínni maréeeḡeenoo ámiḡimmandee nínukamásee asasírana ínni nimisée narí afaaḡa aréenaranaki naróorisaa amaná quḡáaninafa. <sup>25</sup>Moodáa Ánutufa maasá asumu máree marífa. Maasá karaambáiḡa Yísufa aní ásauku mundírafa minánnai maasá amooḡírana qímamidaḡa afaaḡa aréenarana faḡa úriḡararana faḡa afeeka faḡa aiḡámausa aníara náaquḡarana faḡa aníndi máridanoo fee qídaḡa amooḡidaḡa. Óoḡai indaarú aníndi márinau maḡee aníndi máridanoo náaru náaru aníndi máriani. Kúḡaa.